

01 IUNIE
RUGACIUNEA 2
SF. CUVIOS
DIONISIE DE LA GLUSITK

Молитва

О великий Христов угодниче, святой и многомогущий наш предстателю и всея северныя Вологодския страны небесный покровителю, преподобне и преблаженне отче Дионисие! Ты на Небеси Престолу Пресвятыя Троицы со ангелы предстоиши, zde же на земли, во всечестнем сем храме, святыми мощами твоими почиваеши, и данною ти силою свыше благодатию многоразличныя совершаеши чудеса, недужным исцеления подавая; ты святыя и преподобныя ученики стяжал еси на месте сем, Амфилохиа, Макариа, Тарасиа и Феодосиа, с нимиже ныне радости нетленныя во обителех небесных наслаждаеши и на многомогущыя молитвы за нас грешных сия вкупе с тобою подвизаеши. Призри убо милостивно на предстоящыя честней раце твоей люди, умиленно молящыся и просящыя от тебе помощи и заступления. Простри молитвенно ко

Господу Богу преподобней твои руке, и яко имеяй велие к Нему дерзновение, испроси нам от Него оставление согрешений наших вольных и невольных; в болезнях страждущим даруй исцеление, скорбящим утешение низпосли, бедствующим скорую помощь твою подаждь, всем же чтущим тя помилование и спасение и во всем благом благое поспешение исходатайствуй: да твоим святым предстательством получивше благодать и милость от Господа, Царствие Небесное унаследуем, и вкупе с тобою и со ученики твоими прославим великое человеколюбие Троидинаго Бога, Отца и Сына, и Святаго Духа, во веки веков. Аминь.